

بِسْمِ اللَّهِ الرَّحْمَنِ الرَّحِيمِ

KHUTBA JUMMAH

HAZRAT MUHYI-UD-DIN AL-KHALIFATULLAH

Munir Ahmad Azim

14 Octobre 2016 ~
(12 Muharram 1438 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite cause lors « Protèze la Vie et l'Honneur de bane Les Autres » :



L'islam li pas presser pou applique bane sanctions lor so bane citoyens à tort et à travers. Au contraire, bane préceptes islamiques zot bien fermes par rapport à la protection de la vie privée de bane dimounes ki considéré comme sacré. L'islam pas mette en place non plus bane systèmes de surveillance, bane policiers, bane caméras pour filmer bane dimounes, pour espionne zot et analyse zot bane erreurs et péchés.

Abu Dawud et Al-Hakim rapporté d'après Zayd Ibn Wahb:

« Ene missié fine vine kot Ibn Masud, et fine dire li : 'Ki to pou faire à propos Al-Walid Ibn Uqbah, ki so la barbe trempé avec di vin ?...' Ibn Masud fine réponde : 'Rassoollullah (saws) fine interdit nous pou espionner. Si Al-Walid vine vers nous dans situation ki to fine décrire, nous pou puni li.' »

Fine rapporté ki le Saint Prophète (saws) fine dire : « *Si ene chef répanne le doute (suspicion) parmi bane dimounes, li pé perverti (dévié) zot.* » (Abu Dawud, Al-Hakim).

Nous remarqué également ki bane enseignements prophétiques ki bien explicites (c'est-à-dire, ki bien clair) zot incite énormément le croyant pou préserve li-même, c'est-à-dire, pou cachiette so bane propres péchés et pou aussi cachiette péchés de bane les autres. Ibn Umar (ra) fine rapporté ki après ki Hazrat Muhammad (saws) fine sanctionne Maa'iz bin Malik Al-Aslami pou so transgression (l'adultère), Rassoollullah (saws) fine dire : « *Écarte-zot de sa souyure là (la fornication/ l'adultère) ki Allah fine interdit. Si malgré tout, ene d'entre zot trouve zot impliqué là-dans, alors ki li couvert li par le secret d'Allah (c'est-à-dire, li bizin garde pour li-même sa secret là, sans divulguer li) et li bizin repentir à Allah. En effet, celui ki informe nous de so crime bizin recevoir punition d'après le Livre d'Allah.* »

Concernant sa sujet là, anou fer ene jugement conformément à bane critères ki sa deux Imams bien connu là fine fer, c'est-à-dire, Imam Bukhari et Muslim.

Nabi Kareem (saws) ti en effet sanctionne Maa'iz pour l'adultère, après ki sa missié là fine vine vers le prophète (saws) par quatre fois pou avouer avec li so crime, et après ki le prophète (saws) fine rode tout moyen possible pou innocente li de sa aveu ki li fine fer là, kot li fine explik Maa'iz ki tous bane éléments ki nécessaires pou condamne li pas ti présents pou ki li être reconnu coupable d'adultère (excepter so confession). Mais, Maa'iz fine insister. Et même conseille Hazrat Muhammad (saws) fine donner pou ene madame ghamidi (*Al-ghâmidyyah*) ki ti vine vers le Saint Prophète pou avouer ki li fine commette l'adultère.

Nabi Kareem (saws) ti dire à Hazzaal, sa dimoune ki ti conseille Maa'iz pou reconnaite so crime et avouer sa devant le Messenger d'Allah. Li (saws) fine dire Hazzaal : « *Si to ti couvert li (c'est-à-dire, Maa'iz) avec to vêtement (c'est-à-dire, si to ti protège so l'honneur et so secret), sa ti pou meilleur pou toi.* » D'après Abu Hurayra (ra) : « *Le Messenger d'Allah (saws) fine dire : 'Pas ena aucaine dimoune ki pas couvert (cachiette défauts) ene l'autre dimoune lor sa la terre là sans ki Allah couvert li (cachiette so bane défauts, faiblesses et péchés) Jour kot tous dimounes pou relever.* »

Rassoollullah (saws) fine dire : « *Quiconque alle apprane défaut d'ene kikaine et ki couvert sa dimoune là (c'est-à-dire, li pas divulgué sa en public) li couma celui ki fine sauve ene tiffille nouvo-né ki fine enterré vivant.* » (Abu Dawud, Al-Hakim).

Nous remarqué également ki bane préceptes islamiques zot clair, kot sa musulman là li conseille sa dimoune là pou demande pardon avec Allah et pou réforme so conduite,

surtout concernant bane punitions ki ena connection avec bane droits de bane dimounes, ene envers l'autre, pareil couma vol par exemple. Ene fois ki sa zaffaire vine devant la justice, à ce moment là pas pou ena ni pardon ni intercession. C'est dans sa sens là ki sa Hadith de Abdullah Ibn Omar (ra) pé rode fer compran: « *Pardonne-zot entre zot-même concernant bane zaffaires ki capave entraine bane punitions bien graves. Parski, si arriver sa vine devant moi (si mo au courant de sa), alor mo pou oblize donne sanction (ki bizin).* » (Abu Dawud, An-Nasaï, Al-Hakim).

Fine arriver ki ene fois ene dimoune fine vine vers le Prophète (saws) et fine avoué ki li fine commette ene acte ki mérite ene sanction. Le Saint Prophète (saws) pas fine demande ki sa action ki li fine fer là, ni couma li fine fer li. Li fine trouver ki sa dimoune là so confession, ki d'ordinaire capave fer li gagne punition ki fine prescrire pou péché ki li fine fer, li constituer ene repentir ki li fine fer pou sa péché ki li fine fer là, et aussi ki li regretter ki li fine fer sa péché là. Sa confession là li ene acte ki montrer ki li vraiment regretter ki li fine fer sa acte là et ki li prêt pou réformer, et dans le cas de sa dimoune là, sa absolution là ki encore pli justifié parski li fine fer Namaz derrière le Saint Prophète (saws).

Abu Dawud rapporte en effet à propos de celui qui avoué ki li fine commette ene transgression sans ki li nomme ki sa transgression là été, ki ene dimoune ti vine rode le Saint Prophète (saws) et fine dire li : « *Ô Messenger d'Allah, mo fine commette ene transgression et mo oulé ki ou applique lor moi punition ki fine prescrire pou sa acte là.* » Le Saint Prophète (saws) fine demande li : « *Eski to fine fer to Wu'zu avant to vine ici ?* » Dimoune là fine réponde : « *Oui* ». Le Saint Prophète (saws) fine contigner demander : « *Eski to fine fer Salaat avec nous ?* » Dimoune là fine réponde « *Oui* ». Le Saint Prophète (saws) fine alors dire li : « *Aller ! Allah (swt) fine pardonne toi !* » (Abu Dawud, An-Nasaï, Al-Bukhari et Muslim).

Alors, Ô mo bane frères et sœurs dans l'Islam, rappel zot ki nous tous nous temporaire dans sa lé monde là. Alors nous bizin travaille pou ki nous réussi trace ene chemin vers Allah (twf) tout en étant sincère envers Li et en protégeant nous propre dignité et l'honneur et ainsi ki dignité et l'honneur de bane les autres. Préserve toujours le voile ki Allah fine place lor zot et lor bane les autres de So bane serviteurs. Pas fer méchants lor la terre et écarte zot de toute sortes kalité méchanceté et projette le vrai Islam dans zot lé cœur, ainsi ki dans zot bane actions envers l'humanité. Rappelle zot ki ene musulman li ene vêtement pour ene l'autre musulman. Li malheureux celui ki blesse so frère ou so sœur dans l'Islam dans ene bien mauvais façon sans ki li repentir après. Ki Allah protège zot de sa bane mauvais la grains là, bane mauvais la grains ki rongé lé cœurs de bane dimounes. *Insha-Allah, Ameen.*